

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2516 del 04/09/2026

Aproazion de la Conferenza de la Mendranzes linguistiches. Marchiori: “N smaorament di strumenc linguistics a la leta de duta la popolazion”

Canai ORF1 e ORF Sport, envià via l iter per jir inant co la trasmiscions per etres trei egn

[Ladino] Va inant e l é semper maor l empegn de la Provinzia autonoma de Trent per l stravardament de la mendranzes linguistiches e l leam culturèl co l'Euregio. La Conferenza de la Mendranzes – a chela che tol pèrt aministradores e raprezentanc de la istituzions e de desvalives enc de la comunanza ladina, mochen e zimbra – che se à binà en mèrtesc al 1m de setember, reta dal assessor provinzièl a la promozion de la cognoscenza de l'Autonomia Simone Marchiori su delega del president Maurizio Fugatti, la se à dit a una per sperlongèr l contrat de encèria al operador EI Towers S.p.A. de meter a la leta i canai de la televizion ORF1 e ORF Sport. La trasmiscions de l'emittenta austriaca les vergnarà arsegurèdes sun dut l tegnir provinzièl e les jirà inant ence do dai 15 de otober del 2026, fin ai 30 de oril del 2029.

“Sion a la vea de la Di de l'Autonomia e saon ben che la mendranzes l é un de sie pilèstres, bensegur l é stat fat n muie de strèda da chi 5 de otober del '46 per chel che vèrda l stravardament di lengac de mendranza. La difujon di canai per todesch de la TV austriaca ORF sun dut l tegnir provinzièl la nasc da n besegn de la comunanzes germanofones, ma se vel i manèr fora sun dut l tegnir de la provinzia per poder slarièr fora a duta la popolazion i strumenc linguistics a la leta: esser bogn de se entener anter desvaliva zones de noscia Euregio l é de gran emportanza”, à sottrissà Marchiori.

Descheche à dit la sorastanta del Servije mendranzes linguistiches e relacions esternes de la PAT Elisabetta Sovilla, l'operazion la ge va do al renovament per trei egn de la convenzion anter Region Autonoma Trentin-Sudtirolo. GECT e emittenta publica ORF, aproà de oril da la Jonta regionèla.

L percors l respon al besegn de sporjer na informazion azessibola a duta la popolazion, jan sorafora i limic de la piataformes digitèles de neva generazion e i impedimenc che vegn ca dal switch-off tecnoligich del 2022. De gra a la cordanza con EI Towers S.p.a., operador de rei per l'area tecnica locala, l segnal l va sorafora i confins de rezezion che l era dant leé al ripetitor del Mont Paganella. I sentadins podarà seghitèr a veder la programazion ORF sui canai 75 (ORF1) e 76 (ORF Sport) del digitèl terester, tout ite i apuntamenc de informazion desche “Südtirol Heute”.

Dant de serèr su la Conferenza, l assessor Marchiori l à dapò recordà l rich [program di evenc](#) en ocasion del otanteisem cedeon de la cordanza De Gasperi-Gruber, con n focus sui apuntamenc olache la protagonistes sarà la mendranzes linguistiches. L prum l sarà ai 12 de setember a Lusern, col titol “A 80 anni dall'Accordo di Parigi. La tutela e la valorizzazione delle minoranze linguistiche in Provincia autonoma di Trento”, per endrez de la Fondazione Museo storico del Trentino e Lulturinstitut Lusérn, olache tolarà pèrt i raprezentanc di trei Istitut culturèi ladins, mochen e zimber. Ai 27 e 28 de otober del 2026 al Ciasstel del Buonconsiglio l é pervedù la scontrèda “L'Autonomia come strumento per promuovere la cooperazione territoriale: esperienze e buone pratiche di cooperazione territoriale nei Paesi europei” per endrez del GECT Euregio, con n focus su la convivenza de lengac desvalives sui teritories de confin. Ai 11 de november,

enveze, aló dal palaz de la Provinzia, sarà la scontrèda “Minoranze linguistiche e Autonomia, diritto alla lingua e prospettive future”, per endrez del Servije mendranzes linguistiche e relaziuns esternes de la Provinzia autonoma de Trent.

Traduzion di Servijes Linguistics e Culturèi del Comun general de Fascia

(cdt)